

Pidipenteidi

inänite Pabodo nänö cadota

ante yewæmongainta

Waa quëwëedäni, ante

1 ¹Itota Codito ingante në cæmöna inte botö tönö Tímoreo guëa apænemöna ininque botö Pabodobo adoboque yewæmömopa. Minitö Pidipoto iñömö quëwëninque Wængonguï quimîni inömîni inte Itota Codito nempo në quëwëminî iñömînite botö, Acæminimpa, ante yewæmömopa. Mîni pönencabo beyænque ante pancamîniya në aamîni iñömînite pancamîniya guiquënë në cæmîni iñömînite pancamîniya guiquënë önömînique iñömînite botö edæ, Tömämîni edæ acæminimpa, ante yewæmömopa. ²Mönö Mæmpo Wængonguï mönö Awënë Itota Codito tönö waadete pönö cæda ate gänë pönëninque waa quëwëedäni, ämopa.

Në pönëmîni beyæ Wængonguï ingante apænebopa, ante

³Æyedëmë mînitö imînite ante pönëmo inte botö Wængonguï ingante waa ate pönëninque apænebopa. ⁴Ininque mînitö beyæ ante Wængonguï ingante wantæ iñö wantæ iñö apænedinque botö, Waa quëwëminîpa, ante watapæ todinque apænebopa. ⁵Edæ, Botö täno goyedë mînitö godongämæ cæmînitapa. Ayæ, Mönö Codito ingantedö ante mînitö ñöwo ganca godömenque watapæ apæneminîpa, ante pönëninque botö, Wængonguï bitö pönö cæbi ate pidipenteidi waa cædänîpa, ante apænebopa. ⁶Mînitö botö ayömo täiyæ waëmö entawencæminîmpa,

ante në mä badongaingä inongä inte Wængonguï ñöwo Itota Codito nänö ponguinganca godömenque pönö badöninque cöwë iinque badongä ate mînitö ædæmö pæimîni bacæminimpa. Mänömaï impa, ante botö, Nawangä impa, ante do ëñëmopa.

⁷Mönö Codito ingantedö ante watapæ möni ëñëninö ante botö wææ äninque, Nawangä impa, ante apænebopa. Mänîne botö apænede beyænque pancayedëña botö imote tee mönedäni wæbopa. Incæte tee mönedäni wæbo incæ, Nawangä impa, ante wææ ämo incæ Wængonguï nänö waadete pönö cægainö ante ænte entawëñömo mînitö adobaï mäninö ante æninque botö tönö godongämæ entawëminîpa. Ininque, Mönö mäninö ante äanque baï entawëmö imopa, ante mînitö imînite waadete pönëninque botö, Mînitö ædæmö pæimîni bacæminimpa, ante nöingä cæte pönëmopa. ⁸Itota Codito mönö imonte nanguï waadete pönengantawo. Edæ tömengä waadete nänö pönëno ante entawëninque botö mînitö imînite waadete pönëmopa, ante adinque Wængonguï incæ, Pabodo nawangä mînitö imînite nanguï waadete pönengampa, ante apænebaingampa.

⁹Ininque mînitö beyæ ante botö Wængonguï ingante iïmaï ante apænebopa. Mîni waadete pönencabo iñömînite Wængonguï pönö cæcä ate godömenque waadete pönencæminîmpa. Ayæ waadete pönëmîni inte mînitö, Quinö wënæ wënæ i, Quinö waa i, ante edonque adinque nö apænte ämîni

bacæminimpa. ¹⁰Mönö æbänö cæte waa quëwenguī, ante edonque adinque minitō Ao ante waa quëwëninque Itota Codito nänö ponguinganca wentamö mongænāmaī inte tee tēwadāmaī imīni incæminimpa. ¹¹Ayæ Itota Codito pönö cæcä ate minitō nō cædinque waa quëwëminī adinque wadāni Wængonguī ingante waa ate pönëninque apænecædänimpa, ante botō Wængonguī ingante apænebopa. Ayæ minitō mänōmaī inte waa cæminī adinque tōmänāni wæætē Wængonguī ingante apænedinque, Wængonguī ëñëmi. Bitō ñäö bai ëmönömi inte waa pönī cæbipa, ante apænecædänimpa, ante cædinque botō minitō beyæ ante Wængonguī ingante apænebopa.

**Pabodo, Codito beyænque
quëwëmopa, angampa**

¹²Ïñänāni apænebo ëñëedāni. Mänōmaī cædāni botō wædō incæ wīī ðonque cætimpa. Wæætē, Codito beyænque Pabodo caate wæcampa, ante adinque wadāni godömenque nanguī ināni Codito ingantedö ante watapæ möni apænedö ëñëninque wede pönënanī badānīpa. ¹³Edæ, Codito ëmōwo apæneca beyænque Pabodo ingante tee mönedānīpa, ante tededāni ëñëninque odömāno tæiyæ awënë oncö wææ wänönāni incæ wadāni wayömö quëwënanī incæ tōmänāni do ëñënanīpa. ¹⁴Mönö Awënë nempo quëwënanī incæ, Pabodo tee mönete wæcampa, ante wædinque wodo tōmänāni godömenque wede pönente badānīpa. Ìnīnque wede pönëninque tæi piñænte entawëninque tōmënanī guīñënanīmaī inte Wængonguī nänö apænedö ante godömenque apænedānīpa.

¹⁵Pancadāniya, Pabodo miñæ godömenque nanguī ināni godānīpa, ante pönö piinte adinque Codito ëmōwo ante apænedāni incæte botō imote guëadö guëa piincæte ante apænedānīpa. Mänōmaī ï incæte wadāni guiquëñë, Pabodo tönö mönö godongāmæ cæcæimpa, ante gänë pönëninque

Codito ëmōwo ante apænedānīpa. ¹⁶Në gänë pönente apænedāni guiquëñë, Codito ingantedö ante watapæ mini ëñëninö ante Pabodo wææ ancæcäimpa, ante botō imote godö gö cæcampa, ante do ëñënanīpa. Ìnīnque tōmënanī botō imote waadete pönëninque apænedānīpa. ¹⁷Në wæætedö wæætē tededāni guiquëñë, Pabodo tee mönete wæyongante mönö apænëte tomö wæcäi tocæi, ante cædānīpa. Tōmënanī nämä beyænque ante cædāni incæte waa cæte bai cædinque Codito ëmōwo ante apænedānīpa. ¹⁸Incæte pancadāniya nämä beyænque ante apænedāni incæ pancadāniya nō pönente apænedāni incæ mänināni tōmänāni Codito nänö cægäinö ante nāwangä ante do edæ apænedānīpa. Mänōmaī impa, ante pönëninque botō watapæ tobopa.

Ayæ iimāi ante pönëninque cöwë godömenque nanguī tocæboimpa. ¹⁹Minitō Wængonguī ingante botō beyæ nanguī apænemīni ëñëninque Itota Codito Önöwoca pönö cæcæcäimpa, ante ëñente tobopa. Ìnīnque ñöwo botō caate wædö ante edæ iincayæ ate ñimpo cædāni ate edæ botō abæ tawænte gote quëwënguinque edæ impa, ante do ëñëninque tobopa. ²⁰Botō wëëñëñedë botō cæbo bai ñöwo adobai cæinëmo imopa. Ìntai ëñate miimö quëwëmo incæ baonque wänönāni wæmo incæ, Mönö Codito ingante waa acædänimpa, ante cædinque botō cöwë guīñënanīmaī inte tæi ongöninque nanguī cædinque watapæ edæ bacæboimpa, ante pönëmopa. ²¹Edæ inguipoga quëwëmo incæ botō Codito ingante entawëninque tōmengä beyænque ante quëwëmopa. Wæætē wæmo incæ tōmengä beyæ botō godömenque nanguī entawënguimo imopa.

²²Incæte, Waiwæ nanguī incæte bai botō cæquinque inguipoga ayæ quëwënguëñëmo imopa, ante pönëninque botō, Æbänö anguimoo, ante ëñencæte ante wæbopa. Edæ, Wæncæboimpa, ante anguëñëmo imoo. Wæætē, Ayæ quëwëncæboimpa,

ante anguēnēmo īmoo. Edæ, Æbānō anguēnēmo īmoo, ante botō edæ ēñēnāmaī īmopa. ²³Edæ wada bæi ongonte æmatæ töö æmatæ töö godōna wæcā baī wædōmo inte botō, Ædōnō gāmænō goquīmoo, ante wæbopa. Codito weca godōmenque wæmō pōnī quēwencæboimpa, ante botō wadæ goinēmo īmopa. ²⁴Incæte inguipoga quēwēninque mīnitō beyænque ante cæquēnēmo inte botō ædō cæte wayōmō goquīmoo. ²⁵Ante pōnente wædinque botō, Mīnitō mōnō pōnēnō ante godōmenque wede pōnēninque watapæ tote quēwencæmīnimpa, ante cæquīmo īmopa, ante ēñēmopa. Ayæ, Nōwo wænāmaī inte botō mīnitō weca quēwenguīmo īmopa, ante do ēñēmopa. ²⁶Īninque botō mīmo inte mīnitō weca pōmo adinque mīnitō Itota Codito ingante waa adinque botō beyænque nanguī tocæmīnimpa.

²⁷Codito ingantedō ante watapæ mōnō ēñēnīnō beyæ ante mōnō waa cæquēnēmo īmopa, ante ēñēmīni inte mīnitō edæ waa cæte quēwēdāni. Mānōmaī cæmīni ĩninque botō önōmoncaque ēñēmō incæ mīnitō weca ponte abo incæ, Pidipenteidi adoyōmō pōnēninque tæī ongōnānīpa, ante tededāni ēñēninque tobaīmopa. Ayæ, Codito ingantedō ante watapæ mōnō ēñēnīnō ante wadāni ēñencædānimpa, ante pidipenteidi ĩnacabo cædinque nanguī cædānīpa, ante botō edæ ēñente tobaīmopa. ²⁸Ayæ piinte cædāni incæte mīnitō wæætē guīñēnāmaī inte tæī ongōmīnīpa, ante adinque botō tobaīmopa. Mīnitō mānōmaī guīñēnāmaī inte tæī ongōmīni ate wædinque nē piinte ānāni wæætē, Mōnitō wænguīnque impa, ante wæcædānimpa. Nē pōnēmīni mīni quēwenguīnque impa, ante adinque tōmēnāni godōmenque wæcædānimpa. Edæ Wængonguī ængā beyænque quēwencæmīnimpa.

²⁹Wængonguī waadete pōnō cæcā ate mīnitō Codito ingante wede pōnēmīnitawo. Edæ adocā pōnō cæcā

ate mīnitō Codito beyænque cædinque cōwē caate wæquīmīni ĩmīnīpa.

³⁰Pabodobo doyedē Codito beyæ ante wææ ancæte ante caate wætabopa, ante amīnitawo. Nōwo godōmenque wææ cædinque caate wæbopa, ante önōmoncaque ēñēmīnitawo. Īninque botō wææ āninque caate wæbo baī mīnitō adobaī botō tōnō godongāmæ wææ āninque caate wæmīni ĩmīnīpa.

Codito önonganque bayongante Wængonguī da æænongā

2 ¹Mōnō Codito nempo quēwēninque mīnitō wampo pōnēmīnitawo. Tōmēngā waadete pōnēngā beyænque ganca pōnēmīnitawo. Mōnō Codito Önōwoca tōnō āawocaque baī ewocadinque godongāmæ watapæ quēwēmīnitawo. Nē wæcā ingante godō waadete pōnēmīnitawo. Adocanque wæwēngā adinque mīnitō āanque baī wæwēninque tōmēngā beyæ cæmīnitawo. ²Mānōmaī ĩ ĩninque adodonque pōnēninque mīnitō waa waademīni adinque botō watapæ pōnī tobaimopa. Tōmāmīni āanque baī ewocadinque, Mōnō adoyōmō cæcæimpa, ante godongāmæ cæmīni adinque botō godōmenque nanguī watapæ tobaīmopa. ³Īninque mīnitō nāmanque ante pōnēninque, Botō ĩmote waa acædānimpa, ante cædāmaī ĩedāni. Yæcado ongoncæboimpa, ante cædāmaī ĩedāni. Wæætē, Botō önōmoque baī ĩñōmote wadāni wæætē waa pōnī ĩnānīpa, ante pōnēninque wadānīque ĩnānīte ængō cædāni. ⁴Nāmā mīni cæinēnō ante cædinque mīnitō wīī mānīnonque ante cædinque wæætē edæ wadāni nāni cæinēnō adobaī ante cædāni.

⁵Mānōmaī cædinque mīnitō Itota Codito nānō pōnēngāinō baī adodō ante pōnēedāni.

⁶Tōmēngā ĩñōmō cōwē nāwā
Wængonguī ĩnongā ingampa.
Incæte, Botō nāwā Wængonguīmo
ingāimo inte
Mæmpo Wængonguī ganca botō
ingāinō ante ĩmīpo cædāmaī

incæboimpa, ante tōmengä
änāmaï ingacäimpa.

- 7 Wæætē edæ, Mäninō botō
ingainō incæ botō edæ ñimpo
cæcæboimpa, äninque wææ,
önonganque bai bagacäimpa.
Ayæ, Wængonguï ingante nē
cædōmo edæ bacæboimpa, ante
badinque wææ,
tōmengä waomō mönō emönō
bai nänō emonguinque waocä
ēñagacäimpa.
- 8 Mänōmaï ēñate pæte wææ tōmengä
önonganque inte bai cæyongä
Wæmpocä,
Bitō wænguïnō taadō gocæbiimpa,
angä ēñēninque edæ Ao ante
goyongante wææ,
tōmengä nänō guïñēñäquinque
awæ ñænquedimæ cæte mào
timpodäni wææ tiwadäni ate
tōmengä caate wægōninque wææ
baca edæ wængacäimpa.
- 9 Mänōmaï cæcä adinque Wængonguï
wæætē tōmengä ingante æmonga
pōnï da æænongacäimpa.
Ayæ wadäni emōwo önōwoque
emönäni bai tōmengä Tæiyæ
Awënë ñongä inte wïi adobai
önōwoque bai emoncæcäimpa,
ante cædinque Wængonguï edæ,
Itota Codito ingampa, ante pönō
pemongacäimpa.
- 10 Edæ öönädē quëwēnāni incæ
inguipoga quëwēnāni incæ
guimonga quëwēnāni incæ
tōmänāni edæ Itota emōwo ēñente
waa adinque
da guicapocædänimpa, ante
Wængonguï tōmengä ingante
pönō pemongacäimpa.
- 11 Ayæ, Itota Codito ingante adinque
tōmänāni,
Mönō Tæiyæ Awënë ñongä ingampa,
ante edæ Ao ancædänimpa, ante
Wæmpocä cægacäimpa.
Mänōmaï cæcä adinque, Mæmpo
Wængonguï waa pōnï cæcampa,
ante mönō edæ watapæ
apænecæimpa.

**Nëmoncoo äo äo cædote bai
nōinō cæte quëwēedäni**

12 Mänōmaï beyæ botō nē waademini
iñöminite botō apænebo ēñēedäni.
Minitō weca botō quëwēñedē minitō
do ēñente cædimini inte ñowo botō
wayömō quëwēmo incæ godōmenque
ēñente cæmini abopa. ñinque cōwē
mini ēñente cædinō bai adobai
cædinque ñowo mönō watapæ
quëwenguïnō taadonque gocæte ante
cædinque, Oda cæte wæcæ wæ, ante
cōwä aquënë quëwēminii. 13 Wïi
cæinente awædō, ante wæminitawo.
Edæ Wængonguinque apænecä ēñente
entawēninque minitō tōmengä waa pōnï
nänō änō ante nē ēñente cæinēmīni
bamīnīpa. Oda cæte awædō, ante
wæminitawo. Adocä Wængonguinque
mongæcadæ mongæcadæ cæcä ate tæi
pñæmīni bate ate eyepæ cæminīpa.

14 ñinque, Wïi cæinente awædō, ante
änāmaï inte minitō piyænē cæte mīni
cæquënëñō ante do cæedäni. 15 Edæ
mänōmaï cæmini adinque wadäni,
Wentamō mongænāmaï imīnīpa,
ante abainānīpa. Ayæ inguipogaque
quëwēnāni ēñēnāmaï inte idiquibæ
pōnente cæyönāni minitō wæætē
Wængonguï wēñæmīni inōmīni
inte tōmēnāni weca quëwēninque
nëmoncoo äo äo cædote bai nōingä
cæte quëwencæminīpa. 16 Edæ,
Codito pönō cæcä beyænque mönō
quëwengæimpa, ante edonque
apænemīni ēñencædänimpa. ñinque,
Doyedē botō apænēdō ante minitō nē
ēñente cæminīpa, ante adinque botō
nanguï todinque iīmaï ante pönēmopa.
Minitō beyæ pæ pagænte cædōmo
incæte botō wïi önonque cæboimpa.
Wæætē mönō Codito nänō ponguïönæ
iñonte botō, Minitō nō apænemīnitapa,
ante adinque botō tocæboimpa. 17 Ayæ,
Wængonguï quī, ante baō godōninque
woadäni baonga tepæ gao caadänīpa.
Minitō iñömō wede pönēmīni inte,
Wængonguï quī, ante nāmä godō
cæyömīni botō quëwenguimāmo incæ

mīni godōnincōoga gao caate bai ba edæ waa tobaimopa. Mīnitō tōnō godongāmæ edæ tobaimpa. ¹⁸Mīnitō adobai, Pabodo mōnō beyæ cæcampa, ante tocæminimpa. Edæ mōnō edæ godongāmæ tocæimpa.

Tīmoteo tōnō Epapododito

¹⁹Mīnitō æbānō quēwēmīni, ante ēñēnīnque Tīmoteo wæætē apæncæ ēñente tocæboimpa, ante cædinque botō, Itota Codito Ao angā ate Tīmoteo ingante oo da pōnōmo mīnitō weca poncæcæimpa, ante pōnēmopa. ²⁰Mīnitō æbānō quēwēmīni, ante wæyōmo tōmengā adocanque mīnitō beyæ ante botō tōnō guæa wæcampa. Wadāni guiquēnē mīnitō beyæ ante wædāmaī inānīpa. ²¹Tōmānāni edæ nāmā beyænque ante cæinente wædinque Itota Codito nānō ānōnō ante wīi cæinēnāni inānīpa. ²²Cōwā ayōmīni, Tīmoteo iñōmō cōwē waa cæcampa, ante do ēñēmīnitapa. Ayæ mōnō Codito ingantedō ante watapæ apænedinque Tīmoteo tōnō mōna wencaya bai guæa cæmōnāpa, ante do ēñēmīnitapa.

²³Īnīnque, Botō ĩmote awēnēidi æbānō apænte anguīnāni, ante ēñente ate botō Tīmoteo ingante mānīñedē ate mīnitō weca do da pōnōmo poncæcæimpa, ante pōnēmopa. ²⁴Ayæ mōnō Tæiyæ Awēnē Ao angā ate tōmēmo do pōmaimopa.

²⁵Ayæ Epapododito mōnō tōniñacā incæ botō tōnō guæa cæmōna ĩmōnāpa. Wadāni piinte cædāni adinque monātō guæa wææ cæmōnāpa. Tōmengā ingante mīnitō, Pabodo beyæ ante godō cæcæbiimpa, ante do da pōnōmīni ponte cæcā æntabopa. Tōmengā ingante nōwo wæætē adodō mīnitō weca edæ da pōnōmo ponguēnengā ingampa, ante pōnēmopa. ²⁶Adocā Epapododito iñōmō mīnitō pidipenteidi ĩmīnite acæte ante edæ nangui wæcampa. Ayæ, Epapododito daicawo gawængampa, ante apænedāni ēñēnīnque pidipenteidi do wædānīpa, ante ēñente wædinque tōmengā wæætē mīnitō beyæ ante nangui wæwente bacampa. ²⁷Nāwangā

impa edæ. Tōmengā daicawo gawænte wodo wængantapa. Incæte Wængongui tōmengā ingante waadete pōnō gampocā waa bacantapa. Mānōmaī cædinque Wængongui botō beyæ adobai ante pōnēnīnque, Pabodo wīi godōmenque wæcæcæimpa, ante pōnengā inte edæ Epapododito ingante gampocā waa bacantapa.

²⁸Mānōmaī beyæ, Epapododito wæætē pongā adinque tocæminimpa, ante cædinque ayæ, Mīnitō tomīni adinque botō wæwēnāmaī bacæboimpa, ante cædinque botō tōmengā ingante nōwo da godoncæboimpa, āmopa. ²⁹Pongā ate mīnitō, Mōnō Awēnē nempo quēwēnōmi inte pōe, ānīnque Epapododito ingante waa adinque godongāmæ watapæ tote cæedāni. Ayæ wadāni tōmengā bai adobai waa cædānīpa, ante adinque tōmēnāni inānite waa adinque waa cæedāni. ³⁰Mīnitō, Pabodo beyæ ædō cæte cæquīmōnīi, ante, Gobæ awædō, ante wæyōmīnite Epapododito iñōmō edæ, Wæmo incæ cōwē cæcæboimpa, ante mīnitō cæquēnēnō ante cæcantapa. Codito beyæ ante cæcæte ante edæ tōmengā wodo wængantapa cæmīni. Tōmengā ingante edæ waa cæedāni, āmopa.

Tæi piñænte cæcæimpa, ante

3 ¹Nōwo iñōmō botō tōniñamīni ēñēedāni. Mōnō Awēnē nempo quēwēnīnque mīni watapæ toquinque ĩmīnīpa. Mīnitō oda cædāmaī incæmīnīpa, ante botō adodō adodō ante ancaā yewæmōmo incæte wædāmaī ĩmopa.

²Īmaī āmopa. Wadāni iñōmō, Mōnō ēō togænte quēwengæimpa, ante nē ānewēnāni inte guintaidi bai wēnæ wēnæ cædinque nāmā baō ēō ēō towēnānīpa. Ante adinque mīnitō tōmēnāni inānite gomō adinque wææ cæedāni. ³Edæ tōmēnāni inānite ee adinque Wængongui mōnō ĩmonte wæætē pōnō ēō togænte bai cædinque mōnō wentamō mongænō do wido cægacæimpa. Wængongui Ōnōwoca

ingante ænte ewocamō inōmō inte mōnonque edæ, Wængonguī ingampa, ante tōmengā beyæ cæmompā. Itota Codito nempo quēwēmō inte mōnonque wīī inguipoga beyænque quēwēmō imompā, ante mōnō tōmengā ingante waa ate apænemompā. ⁴Tōmēnāni guiquēnē inguipogaque ante pōnēninque, Mōnitō cædō beyænque quēwencæmōnimpā, ante pōnēwēnānipā. Tōmēnāni nāni pōnēwēnō baī adobaī pōnente baī botō, Tōmēnāni wædænque cæyōnāni botō godōmenque nanguī cædōmo imōpā, ante pōnēwencædōmoimpā. Edæ, Nanguī botō cædō beyænque quēwencæboimpā, ante pōnēwencædōmoimpā.

⁵Edæ tōmēnāni nē ēō togæīnāni inānitawo. Botō inōmō adobaī imōpā. Tæcæ ēñayōmote ōnompō æmæmpoquē go mēōnā go adoōnæque mānimpoōnæ inōnte botō imote do ēō togæīnāni wægaboimpā. Tōmēnāni idægoidi inānitawo. Botō inōmō idægo wodi pæīmo inōmo inte tōmengā nānōmocā Beencamīnō wodi pæīmo inōmo imōpā. Tōmēnāni ebedeoidi inānitawo. Botō inōmō ebedeobo ēñagāimo inte nāwā ebedeobo inōmo imōpā. Tōmēnāni Paditeoidi inānitawogaa. Edæ botō Paditeobo inōmo inte Mōitee wodi nānō wææ angaiñō ante mōni Paditeocabo wædō ante tōmāā ēñente cædōmo imōi aedāni. ⁶Ayæ tōmēnāni, Wængonguī beyæ nanguī cæcæimpā, ante apænedānitawo. Edæ, Wængonguī beyæ cæbote, ante edæ botō inōmō doyedē Codito ingante nāni pōnengaincabo inānite ancaā togænte pancæte ante cægaboī aedāni. Ayæ oodeoidi guiquēnē, Mōnitō wææ angaiñō ante nē ēñente cædānique nē nō cædāni inānipā, ante ānānitawo. Botō inōmō edæ māniñonque ante cōwē cædōmo inte wentamō mongænāmaī inōmo imōpā.

⁷Doyedē inōmō botō mānōmaī godōmenque waa cædīmo inte, Botō toquinque waa pōnī cægaboimpā, ante pōnēwentabopā. Nōwo guiquēnē botō waa cægaiñō ante, Ōnonquedō

ante cægaboī, ante do ēñēmopā. ⁸Ayæ wææ, Itota Codito botō Awēnē ingante adīmo inte botō tōmengā ingante pōnēninque tōmengā tōnō godōmenque waa pōnī quēwencæboimpā, ante botō, Wēēnēñedē botō entawengaincoo botō waa againcoo incæ edæ ēwenguincooque impā, ante pōnēmopā. Edæ Codito beyæ ante cæyōmo botō wēēnē mānincoo tōmancoo edæ dæ ba wætabopā. Inīnque, Codito ingante godōmenque ēwocacæboimpā, ante nanguī cædinque botō, Wēēnē botō entawengaiñō ompotacoo baī impā, ante wido cæbopā.

⁹Edæ, Īīmaī cæedāni, ante nāni wææ angaiñō ante ēñente cæbo incæte Wængonguī ayongante botō ædō cæte māniñō beyænque nō entawēmō baquīmoo. Wæætē Codito mōnō nē nō cædongā ingante wede pōnēmo inte tōmengā nempo quēwēñōmote Wængonguī pōnō badongā ate nō cæbo bacæboimpā, ante nanguī cæbopā. ¹⁰Mōnō Codito ingante ate baī pōnencæboimpā, ante cæbopā. Ayæ tōmengā adocā nanguī tæī piñænīnque nāni ōmæmongacāimpā, ante wede pōnēninque botō māniñō tōmengā nē nāni ōmæmongaingā nānō tæī piñænō baī adobaī entawencæboimpā, ante cæbopā. Ayæ adobaī, Tōmengā caate nānō wængaī baī botō tōmengā beyæ wæncæboimpā, ante pōnēninque botō tōmengā tōnō godongāmæ caate wænte baī tōmengā nānō ēwocadō baī ēwocacæboimpā, ante cæbopā. ¹¹Mānōmaī cædinque botō, Tōmengā wænte ate nāni ōmæmonte nānō quēwengā baī botō adobaī wænte ate nāni ōmæmoncæboimpā, ante nanguī cæbopā.

Mānōmaī bacæboimpā, ante nanguī cæbopā, ante

¹²Mānōmaīnō ante apænedīnque botō, Codito nānō entawēnō baī do entawēmopā, ante dicæ apænebogaa. Picænāni baī do badīnque nō cædinque oda cædāmaī imōpā, ante dicæ

apænebogaa. Incæte Itota Codito incæ edæ, Botö ewocadö bai adobai ewocacæbiimpa, ante botö imote do bæi ongongacäiimpa. Ìninqe botö wæætë, Tömengä waa pönì nänö ewocadö bai adobai ewocacæboiimpa, ante bæi ongoncæte ante nanguí cæbopa. ¹³Ìñänäni ëñeedäni. Botö Codito nänö ewocadö ante dicæ eyepæ æmogaa, ante wæbopa. Incæte, Eyepæ ænämai ìmopa, ante adinqe wæwënämai ìmopa. Wæætë, Ìncayæ ate Codito nänö ewocadö bai ædæmö ewocacæboiimpa, ante cædinque botö mäninonque ante pönëninque pogodo gote bai cöwë cæbopa. ¹⁴Wængonguì do, Bitö Itota Codito nempo quëwënömi inte eyepæ cædinque æmonga ponte æe, ante botö imote aa pegacäiimpa. Ìninqe tömengä, Pædæ pönömo æncæbiimpa, ante nänö angaincoo ante ænte ewocacæte ante botö gänä cæcæte ante pogodo gote bai edæ nanguí cæbopa.

¹⁵Mönö æmäwo picæmö badömö ìñömö tömämö adobainö ante pönenguënëmö ìmopma. Pancaminiya guiquënë mänömainö ante wii pönëmini adinqe Wængonguì, Minitö æbänö nö pönenguënëmini ìminii, ante pönö odömongä ate ëñencæminimpa. ¹⁶Mönö do ëñente quëwenganca mäninganca mönö cöwë nö cæte quëwengäiimpa.

¹⁷Ìñänäni ëñeedäni. Botö Pabodobo æbänö cæboo, ante adinqe minitö botö cædö bai adobai godongämæ cæedäni. Ayæ, Mönitö cæmöni bai minitö adobai cæedäni, ante odömömöni bai pancadäniya adobai cædäni adinqe minitö ìñömö, Adobai cæcæiimpa, ante tömënäni inänite cöwä aedäni. ¹⁸Minitö ìminite wantæ wantæ ìñö wantæ wantæ ìñö apænedimo inte botö ñowo Ca ca wædinque adodö ante ìimai ante godömenque apænebopa. Mönö Codito awäa wængä incæte nanguí inäni tömengä ingante Baa äninque tömengä nänö wængaiwæ ante piinte bai cædänipa, ante awædö. ¹⁹Tömënäni nänö ömæe ewente wæquinque mänömai cædänipa. Cænguì beyænque ante

pönente quëwënänipa. Wënæ wënæ nänì cædö beyæ guingo imonte wæquënänäni incæ tömënäni wæætë guiñëñadämai inte edæ, Waa pönì cæmönipa, ante nämä incæ waa adänipa. Edæ inguipoga beyænque ante cæinente wædänipa.

²⁰Mönö ìñömö mempoga ëñagaïmö inte mönö öönædë ömæ do ëamö edæ ìmopma. Ìninqe mönö Awënë Itota Codito, Quëwencæminimpa, ante në Ængaingä ingante nanguí aïnente wædinque mönö, Tömengä æyedëno öönædë edæ wææ ponguingäa, ante wänö cömopma. ²¹Tömengä ìñömö täi piñængä inte tömancoo edæ bæ tadinque ö æninque Tæiyæ Awënë incæcäiimpa. Ìninqe, Mönö quëwenguinämai aquiiñö ëñamopma, ante adinqe tömengä täi piñængä inte, Botö baö bai täiñö mongæncæminimpa, ante badongä ëñaquimö ìmopma.

Mönö Awënë nempo quëwëninque watapæ tocæiimpa

4 ¹Wængonguì botö imote poganta pönö wencate bai cædinque, Bitö waa apænebi ëñente beyænque pidipenteidi ëñente waa cædäni abopa, angä ëñëninque botö minitö beyæ ante watapæ tobopa. Minitö ìminite ædæmö waadedinque botö, Æyedëno bee tenguimoo, ante wæbopa. Ìninqe botö në waademini ämo ëñeedäni. Mäninö botö äninö ëñente cædinque minitö mönö Awënë nempo quëwëninque täi ongöedäni.

²Ñowo Eodia, Tintique, mäna onquiyæncaya ìminate ämo ëñeeda. Mönö Awënë nempo quëwëninque minatö piyænë cæte adodunque ante cæbæweda, ämopa. ³Botö mönö Awënë ingantedö ante watapæ apænecæte ante nanguí cæyömate Codëmente tönö wadäni botö tönö ìñacabo cædänitapa. Wængonguì, Nänì quëwenguinta, ante tömengä nänö yewæmongaintaa tömënäni ëmöwo dobæ yewæmonte mä öñopma. Tömënäni botö tönö cæyönäni ìina onquiyæna Eodia tönö Tintique

īñōmō botō tōnō adobaī īñacabo nanguī cæda inatapa. Īnīnque bitō cōwē botō tōnō guēa cædōmi īñōmite bitō ĩmite āmopa. Īīna inate bitō waadete apænebi ēñēnīnque piyænē cæte quēwencædaīmpa.

⁴Ayæ tōmāmīni ĩmīnite, Mōnō Awēnē nempo quēwēnīnque watapæ tote quēwēedāni, āmopa. Edæ, Watapæ pōni tote quēwēedāni, ante adodō ante āmo ēñēedāni. ⁵Mōnō Awēnē edæ oo pōni poncæcāīmpa cæmīni. Ee ædæmō cæte quēwēñōmīni tōmānāni waadete mīni cædōnō ante edonque acædānīmpa.

⁶Ayæ, Quiēmē bacæ wæ, ante mīni wædō ante guīñente wædāmaī ĩedāni. Wængonguīnque ingante apæneedāni. Apænedīnque, Wængonguī, bitō pōnō cæbi ate eyepæ inte quēwencæmōnīmpa, ante quiēmē mīni æncæ wædō incæ ante apænecæmīnīmpa. Ayæ tōmengā pōnō cæcā adīnque mīnitō, Bitō pōnō cæbi waa æmōnīpa, ante Wængonguī ingante wæætē waa ate pōnente apæneedāni. ⁷Ayæ, Wængonguī piyænē cædinque pōnō aacā beyæ mīnitō Itota Codito nempo quēwēnīnque piyænē cædinque mīmōnē wædāmaī inte nō pōnēnīnque quēwencæmīnīmpa. Edæ mōnō, Æbāmē cæte Wængonguī pōnō piyænē cæte aacā, ante mōnō waocabo ēñēnāmaī ĩmō incæte tōmengā cōwē godōmenque aacā ate wædāmaī inte quēwēmōmpa.

**Quīnō waa ī, ante mānīnonque
ante pōnēē cōedāni, ante**

⁸Īñānāni ēñēedāni. Mīnitō æbānō ante pōnēē congūēnēmīni ĩmīnīpa, ante yewæmōnīnque botō ñōwo æmæwo pōni yewæmōmōi aedāni. Nāwangā nāni apænedō ante pōnēē cōedāni. Æbānō waa cæquiī, æbānō nō cæquiī, ante pōnēē cōedāni. Quiēnō nō ī, ante mānīnō ante pōnēē cōedāni. Mōnō æbānō waadete pōnenguīī, ante pōnēnīnque mōnō waa adoncoo ante adobaī pōnēē cōedāni. Wadāni waa nāni cædīnō ante pōnēē cōedāni. Mānōmaī cædāni ate wadāni waa adānitawo. Īnīnque tōmēnāni nāni waa

adīnō ante mīnitō mānīnō ante pōnēē cōedāni. Īnīnque, Quiēmē waa pōni ī, ante adīnque mānīnonque ante pōnēē cōedāni.

⁹Botō odōmonte apænebo ēñēmīnitawo. Īnīnque botō pōnō apænebo ēñēnīnque mīni ēñēnīnō baī tōmānō ante edæ cæedāni. Botō pædæ pōnōmo æmīnitawo. Īnīnque botō pædæ pōnōmo mīni ænīnō incæ ee mæedāni. Botō entawēnō ante, Æbānō entawēmoo, ante edonque amīnitawo. Īnīnque botō entawēnō mīni adīnō baī mīnitō adobaī entawēnīnque edæ waa cæedāni. Mānōmaī cæmīni adīnque Wængonguī nē gānē pōnēnongā inte mīnitō tōnō godongāmæ quēwēnīnque pōnō cæcā ate mīnitō wæætē gānē pōnēmīni bacæmīnīmpa.

**Pidipenteidi mīni pōnōni waa
æntabopa, Pabodo angampa**

¹⁰Botō wædō ante mīnitō doyedē pōnō cædīmīni inte ñōwo wæætē tæcæ pōnente wædinque wæætē pōnō cæmīni ænīnque botō, Mōnō Awēnē beyænque pōnō cæmīnīpa, ante adīnque nanguī waa tobopa. Edæ botō wædō ante cōwē waadete pōnēmīni incæte mīnitō da pōnoncæ cæyōmīnite wææ cæte ī æiquedō da pōnonguīmīni. ¹¹Incæte mānōmaī apænedīnque botō wīī ænguēnēmo inte apænētabopa. Edæ wædænque ēabo incæ nanguī ēabo incæ quiēmē ēabo incæ botō, Æbānō quēwenguīī, ante do ēñēmo inte edæ piyænē cæte wædāmaī cōwē quēwēmōpa. ¹²Ōmæpobo wædīmo inte botō, Ōmaadāni æbānō quēwēnāniī, ante do ēñēmōpa. Adobaī nanguī ēate quēwēnīmo inte botō, Nanguī ēadāni æbānō quēwēnāniī, ante do ēñēmōpa. Edæ tōmo cæmo incæ, gæwænte wæbo incæ, nanguī ēabo incæ, ōmæpobo incæ mānīnō tōmānō ante wægaimo inte botō mānōmaī ingaimo beyænque ēñente batabopa. Īnīnque æyōmōmē quēwēmō incæ quiēmē baī quēwēmō incæ piyænē cæte wædāmaī quēwēmōpa. ¹³Edæ quiēmē beyæ wæbo incæ mōnō Codito

pönö cæcä ate botö wæætë edæ eyepæ entawëningue tömää edæ cæbopa.

¹⁴Incæte botö ömæpobo inte wæyömete mīnitö pönö cæmīni waa æntabopa. ¹⁵Ayæ adobaī mönö Codito ingantedö ante watapæ möni apænedö ante tæcæ ëñëmīni ate botö Mäatedöniabæ iinque apænedinque wadæ goyömete wadāni Codito ingante nāni godongämæ pönencabo pönönāmaī iñönānite mīnitö adomīnique da pönömīni æntabopa, ante mīnitö pidipenteidi do ëñëmīnīpa. ¹⁶Edæ, Tetadönica nāni quëwëñömö quëwëningue Pabodo ömæpocä bacampa, ante tededāni ëñente wædinque mīnitö wīi adopoque wæætë wæætë da pönömīni æntabopa.

¹⁷Botö dicæ botö æncæ wædö ante apænetabopa. Wæætë, Pidipenteidi wadāni inānite nē godönāni inānīpa, ante adinque Wængonguī wæætë mīnitö imīnite godömenque pönongä æncæmīnīpa, ante apænetabopa. ¹⁸Iinque botö iñömö idæwaa æntabopa. Botö ænguënēnö æninque godömenque nangui ænte ëabopa. Edæ, Pabodo quī, ante mīni da pönönincoo Epapododito wæætë botö imote pædæ pönongä æninque botö eyepæ pönī èate quëwëmopa. Mīnitö, Wængonguī quī, ante oguī waquī baī pönö iya tante baī cædinque, Pabodo quī, ante da pönömīni

adinque, Waa pönī pönömīnīpa, ante Wængonguī incæ waa acampa. ¹⁹Botö Wængonguī nāö baī entawëningue tæi ëmongä inongä inte tömengä nänö ëadoncoo iñömö edæ bacoo pönī ongompa. Iinque, Mīnitö ænguënēmīni imīnīpa, ante adinque tömengä Itota Codito beyænque cædinque eyepæ pönī edæ da pönongä æncæmīnīpa.

²⁰Mönö Wængonguī mönö Mæmpo iñongante, Bitö waëmö pönī inömi imīpa, ante mönö cöwë watapæ apænecæimpa. Edæ nōwopāmo incæ mīimāmo incæ mönö cöwë mänömaī apænecæimpa. Mänömaī impa, äninque botö, Amëë, ämopa.

Mäninque ante yewæmömopa, ante

²¹Wængonguī quīnāni Itota Codito nempo quëwënönāni iñönānite mīnitö, Waa quëwencæmīnīpa, ante botö beyæ ancæmīnīpa. Ayæ botö tönö godongämæ ongönāni incæ, Mīnitö æbänö quëwëmīnīi, ante wædānīpa. ²²Edæ Tæiyæ Awënë Tetædo oncönë quëwënāni tönö wadāni Odömä iñömö wayömö quëwënāni tönö Wængonguī quīnāni incæ tömänāni adobaī mīnitö imīnite, Waa quëwencæmīnīpa, änānīpa.

²³Mönö Awënë Itota Codito mīnitö imīnite waadete pönö cæcæcäimpa, ämopa. Mäninque ante yewæmömopa.